



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliarvm Omnivm Generalivm Et Provincialivm Collectio Regia

Ab anno DCCCCX. ad annum MLXXIII.

Parisiis, 1644

Tabvla Legvm Ecclesiasticarvm.

urn:nbn:de:hbz:466:1-15625

nere, aures vero animumque ad ea attendant qui velint. Malus siquidem est custos qui creditum sibi gregem voce saltem, si ultra non detur, aduersus eum qui spoliaturus venit non defenderit. Vnus autem omnium nocentissimus est diabolus, qui operose hoc vnum molitur semper vt mortalium animis struat calamitatem. Quapropter pastores vigilare, excubare, & proclamare oportebit, vt quæ populo ab his infensis aduersariis impendent mala, eis prauifa atque præcauta sint omnia. Pastores vocamus episcopos & sacerdotes, quorum partes sunt eruditione atque doctrina gregem Domini speculari ac defendere, ne eum aliquando lupus furore & scelere inflammatus mordicus laceret atque dilaniet. Verumtamen si quis tum denique fuerit, cuius aures diuinis præceptis ac monitis non pauerint, eius rei rationem causamque Deo reddat atque exponat necessum est. Collaudetur nomen Domini in perpetuum; ei laus, gloria, & honos, in omnes sæculorum ætates. Amen.

TABVLA LEGVM ECCLESIASTICARVM.

- | | |
|---|---|
| I. <i>De iustitia efferenda.</i> | XII. <i>De ordinato capitis reo.</i> |
| II. <i>De misericordia exhibenda in iudicio.</i> | XIII. <i>De reo confessarium petente.</i> |
| III. <i>De Christiano non vendendo extra regnum.</i> | XIV. <i>De die dominica & festis obseruandis.</i> |
| IV. <i>De sagis sortilegis, &c. eiiciendis.</i> | XV. <i>De ieiunium violante.</i> |
| V. <i>De gentilium superstitionibus abolendis.</i> | XVI. <i>Vt quadragesima & festa non temerentur.</i> |
| VI. <i>De homicidis peierantibus & mæchantibus.</i> | XVII. <i>De ecclesia debita vi detinente.</i> |
| VII. <i>Quod peccatum turpius sit in diebus & locis sacris; & maiores magis sunt plectendi.</i> | XVIII. <i>De sacrum ordinem violante.</i> |
| VIII. <i>De ministrum altaris occidente.</i> | XIX. <i>De adulterio.</i> |
| IX. <i>Vt rex sit ordinatis & alienigenis patronus.</i> | XX. <i>De incestuosis.</i> |
| X. <i>De ministro altaris homicida, &c.</i> | XXI. <i>De viduam violante.</i> |
| XI. <i>De ordinatum vinciente aut verberante.</i> | XXII. <i>De uxoris adultera pœna graui.</i> |
| | XXIII. <i>De vxorato fornicante, aut concubinam habente.</i> |
| | XXIV. <i>Vt alienigena libidinosi eiiciantur.</i> |
| | XXV. <i>Vt homicida in purgatione cadens episcopo tradatur.</i> |

XXVI. De eo qui excommunicatum vel vitlagatum custodierit. XXVII. De misericordia exhibenda. Pii regis pia peroratio.

PRO O E M I V M.

HÆC illa humana atque politica sunt iura, quæ sapientum adhibito consilio per omnem Angliam obseruari præcipio.

LEGES ECCLESIASTICÆ.

I.

In primis iustæ leges vt efferantur, iniustæ deprimantur, volo. Iniquitatē atque iniuriam pro sua quisque virili parte omnem e regno radicitus euulsam funditus extirpato, iustitiamque extollito diuinam. Ad posterum vero inopes æque atque diuites digni qui iure fruuntur legitimo putandi sunt, atque vtrisque ex æquo & bono ius reddendū.

II.

Edocemus autem, vt si quis in re deliquerit aliqua, adeoque capitale aliquod crimen admiserit, ea tamen in multa irroganda adhibetor moderatio, vt ad diuinam clementiam temperata hominibus tolerabilis esse videatur. Et quidem animo cogitet, qui iudicia exercet, ipse quid petat cum ad hunc modum loquatur: *Et dimitte nobis debita nostra, sicut & nos dimittimus*, &c. Interdicimus autem ne Christianus quisquam ad mortem exiguæ alicuius & contemnendæ rei causâ mittatur: quin potius miti & moderata ad reipublicæ vtilitatem vtendum erit animaduersione. Neque enim pro tantulo opus manuum Domini, quodque ipse ingenti redemit precio, deperire sinant.

III.

Prohibemus autem, ne Christiana fide tinctus quispiam a regno procul amandetur, neve ad eos qui nondum Christo fidem adiunxerunt relegatur: ne eorum aliquando fiat animorum iactura, quos propria Christus vita redemit.

IV.

Præterea etiam præcipimus, ditio vt hæc nostra vndique purgetur, atque a nefariis sceleribus vsquequaque temperetur. Tum, si sagæ, ariolantes mulierculæ, tabificæ, meretrices foedæ ac flagitiosæ sicubi in regno deprehen-